


Л 2005
8533



Пернебай
Дүйсенбин

ЕЛГЕЗЕК ЕРТЕГІЛЕР ЕЛІНДЕ

Пернебай Дүйсенбин

**ЕЛГЕЗЕК
ЕРТЕГІЛЕР ЕЛІНДЕ**



Салалар
ДЕВИЕТ

Астана · 2004

821.512.122-93

ББК 84 Қаз 7-4

Д 87

Дүйсенбин П.

Д 87 Елгезек ертегілер елінде. — Астана: “Балалар өдебиеті” баспасы.
— 2004. 133 бет.

ISBN 9965-650-19-5

Жинаққа автордың таңдамалы әңгімелері мен ертегілері енгізіліп отыр. Тәтті балалық шақ қиялымен гажайып суреттелген оқиғалар жұтқызыңға орын тартыымды. Ауыл өмірі мен қала өмірі аралас берілген. Балалық бал дөуренің үзыны таңдайдан кетпеген балақандар да, ересек оқырмандар да дең қойып, көніл бөліп оқи алатын дүниелер баршылық.


K 4803250205-000
480(05)-04

ББК 84 Қаз 7-4

ISBN 9965-650-19-5

© Дүйсенбин П., 2004

© “Балалар өдебиеті” баспасы, 2004



АЯҚТАЛМАҒАН АҢЫЗ НЕМЕСЕ АЛДАРКӨСЕ ТУРАЛЫ ХИКАЯНЫҢ ЖАЛҒАСЫ

Босағасын аттаған бөгде жанға бір жұтым су татырмай, нәр сыйзырмай шығаратын, айдай әлемге аты жайылған Шығайбайды Алдар Көсе жер соқтырып кетті...

Өрісте қаптаған қалың қойының сонында журген Шығайбай бүгінгі түні үйінде болған жайды есіне алғанда, ыздан жарылып, өліп кете жаздады. Ет орнына ескі етігінің сірісін жегені, май орнына сиырдың жас жапасын асап алғаны ойына оралғанда, лақ еткізіп құсып жіберді. Бәрінен де арқасына аяздай батқаны — сүйікті атынан біржола айырылғаны болды. Өмірінде сырт кісіге суыртпақ жіп ұстатьп көрмеген Шықбермес Шығайбай өзінің Алдар алдында жас баладай алдануының сырын көпке дейін түсіне алмай, шақшадай басы шарадай болды. Қабагы қара түндей түйіліп, түнеріп кетті. “Құдайым-ау, мені қандай тажалға жолықтырдың?” — деп ішінен еріксіз күйзеле күбірлеп қойды. “Тіпті жалғыз күлшені де бүйыртпағаны қорлық болдығой бәрінен,” — деп Алдарды жеті ата жеке суына жеткізе қарғап-сіледі.

Аш қасқырдай ұлыған іші қарнының қатты ашқандығынан хабар бергендей. Анау көк балаусаға бас қойып, рақатқа кенелген қалың қойға көзі түскенде,

аш көз қызғаныштың тікенді тырнағы ішін тырнап-тырнап алды. Көзіне қан толып кеткендей. Қасындағы шонғал тасқа құтырына ойнақ салған қос текешікті тобылғы таяқлен жіберіп үрді да, қойтасқа сылқ етіп отыра кетті.

Мынау кең дүние көз алдында бір уыс болып тарылып сала берді...

Кешке ауылға тақана бергенде, алдынан ойбайлап бәйбішесі шықты.

— Құрган ғана, қу қақпас-ау, Бізбикені өлгі қу аяққа көзің қалай қиды? Бұл дүниеде сендей адам болар ма? Құдайым-ау, ортамыздың жалғыз баланы шырылда-тып, сайда саны жоқ, құмда ізі жоқ алаяққа бере салуға қалай ғана дәтің барды?

Шығайбай қой шетінде қаққан қазықтай қалшиып катты да қалды. Өз құлағына өзі сенбеді. Бәйбішесінің сұнқылдаған үнінің аяғын тындарастан бар даусымен баж етіп:

— Иттің ғана баласы, мен бізді бер деп едім ғой, не айтып тұрсын, ойбай? — деп жер тырмалап отыра кетті.

— Алжыған неме-ау, алыстан айқайлап: “Берсөң беріп құтыл сол бәледен” — деген өзің емес пе!

— Қу шұнақ құдай-ау, о заманда бұ заман бұралқы иттей кезбеке қыз бере салатын мені есуас деп пе едің-еїй, сен?

Шығайбай қайнап кетті. Тобылғы таяқ басына барып таңқ еткенде, ол шалқасынан түсті. Айқай шыққаннан үй артына тасаланған тоқалы қожасының кәрінен қорқып, іргедегі топ шенгелдің түбіне барып тығызып қалған-ды. Шығайбай талықсып жатқан бәйбішесінің бүйірінен ыңқ еткізіп бір тенті де, сылқ етіп отыра кетті. Еңк-еңк етіп, әйелдерше дауыс айтып жылады.

Қора аузында топталған қойлар қожасының мына қылышына таңданғандай, бәрі оған аңтарыла қарап қалған-ды...

Шықбермес Шығайбай құла жорғасын тайпалатып келе жатты. Көкейіне түйген ойы біреу-ақ. Ол — өзін қу тақырға отырғызып кеткен Алдардың үстінен Алаша ханға арыз айтып, есесін алғып, кек қайтару. Бір ашуын бойына жиып, жауар күндей түйіліп, тістеніп алған. Тісін шакұр-шұқыр еткізіп, қалай қайрағанын өзі де аңғармай қалды.

Күн ыстық еді. Сараң байдың аты да, өзі де шөлге бой алдырайын деді.

Жалғыз аяқ соқпақ сайға құлады. Оның табанымен жылтырап ағып жатқан жылғаның басы өудем жерде екен. Бұлақ басында, үй орнындаі дөп-дөңгелек жерге, өскен жап-жасыл бояқтай көк шалғын ерекше құлпырып, бөлекше көз тартады. Өзі де, аты да бұлаққа келе бас қойды. Суды сыңғытып ішіп жатыр.

Шығайбай көк шалғынға бауырын төсеп жата кетті. Салқын су, салқын ауа, жасыл шөптің хош иісі тал бойын маужыратып, үйқыға әкете берген...

Құлан мен Түлен екеуі тұла денесін көтере алмай биік жартас қуысындағы уақытша мекенінде үш күн жатты. Көк ала торғайдай болған денелері күп болып ісіп кеткен еді.

Осыдан үш күн бұрын Алдар Көсемен болған шайқасты естеріне түсірсе, тәбе шаштары тік тұрады. Он екі өрім бұзау тіс қамшы мен ұзын сойылдың сойқан

соққысы естерінен еш кетер емес. Бұл күндері үйқыдан талай рет шыңғыра айқайлаг, шошына оянулары тым жиілеп, тұн үйқылары төрт бөлінетін болған. Жығылғанға-жұдырық дегендей, сол шайқас болған күннің кешінде от мүйізді, жылан құйрықты, жолбарыс тісті, арыстан басты Ібіліс келіп, қос шайтанды шапалақтан шарт еткізіп, жалпысынан түсірген. Айыр тырнағымен мойындарынан қылғындырып алып, қаһар төге сөйледі:

— Құдайдың қаһарына шалынған қос малғұн, ел аман, жұрттынышта бар қасиеттерінен жүрдай болып, жүрістерің мынау. Екеуінде жұртыңа көрінер не бет калды?! Бір адамды алуға шамаларың келмесе, несіне шайтан болып жүрсіндер?!

— Тақсыр-ау, көп адамды алдадық. Бірақ Алдар деген бәлеге жолыққалы жолымыз болмай қойды, — деп Құлан қырылдаған күйі мәймөңкелеп сөйлей беріп еді, долданып алған Ібіліс оның сөзін аяқтатпай ақырып жіберді. Қос мүйізінен жарқ ете қалған жалын от жықпыл жартастың қуыс-қуысын жұмбақ түсті сөүлемен алаулатып, долыра жалап өтті.

Құлан мен Тұлен қылқынып өлуге шақ қалды. Ібілістің темір қысқаштай тарылып бара жатқан саусақтары сәт санап сығымдағанда, жандары мұрныңғы ұшына келді.

— Алдардың арқаларыңа мініп, жауыр қылғанын кештім. Ат басында алтыннан айырылып, алданғанда-рынды кештім. Тіл-ауызды үйірген қымыз бен қазыдан, жал мен жаядан мақұрым қалғандарынды кештім. Ал тіл астарына салып берген сикқыр тенгеден қара басып айырылғандарынды қалай кешпекпін?! — ақырып жіберіп, қос тізесімен жерде жатқан екеуін нығырлап

жібергенде, төс сүйектері күтір-күтір етіп, сыншып кеткен тәрізді болды. Көздерінен жастары ытып-ытып кетті. Жан ұшыра шар еткен екеуінің аңы айқайы шыққанда, онымен жарыса дыр етіп қатты естілген бөлекше үнді бір дыбыс Ібілістің өзін селк еткізді. Селк ете қалған Ібіліс арт жаққа жалт бұрылғанда, мұрнына жағымсыз, жидіген құлімсі иіс келді.

Ібіліс тізесіне шоқ тигендей, орнынан шорши атып тұрды да, тыжырына:

— Ой, пәдіріңе нәлет, өңкей найсан, қылықтарын!
Бірақ даусы бұрынғыдан жұмсаған тәрізді.

Құлан мен Тұлен есенгіреген қалыптарымен орындарынан тұрып, оған жалтақ-жалтақ қараған күйі, артқа шегіншектей берді.

— Тоқта! — деп Ібіліс қайта ақырып жіберді.— Тіл астына салатын сиқыр теңгені Алдардан қашан қайтып алмайынша, шайтан елінің шекарасына түяқ тигіземін деген ой қаперлеріңе кірмесін! Түсіндіндер ме?

Екеуі қосарлана:

— Иә, түсіндік, — деп дірілдей үн қатты.

— Сиқыр теңгені қашан қолдарыңа түсіргенше, адам көзіне көрініп жүретін қалыптарында қала беретіндерінді өздерің де білесіндер. Менің далаға шашып жүрген басы артық сиқыр теңгем жоқ сендерге бере-тін, — деді де көзден ғайып болды.

Құлан мен Тұлен екеуінің еніреп жылап қала беруден басқа шарасы да қалған жоқ еді.

Содан олар жартастағы қуыста үш күн жатты. Алдардан қайткен күнде де кек алудың, сиқыр теңгені қолға түсірудің неше түрлі айласын ойлап, сан алуан қиялға берілді. Бұл аралықта арқа-бастарының ісігі де

қайтып, оңалуға бет алған-ды. Өздері де шөлден әбден қаталап, қарындары да қатты ашты.

Құлан мен Түлен сол күні жартастағы мекенінен жайлап шығып, өздері су ішіп жүрген бұлақ басына қарай беттеген. Оған тақанып келгенде, екеуі ауыздарын ашып тұрып қалды. Әлдекім көк шалғында шалжия құлап, үйқыны соғып жатыр. Олар бір бүйірлей жатқан адамның жүзін барлай қарады, бұғағы білеуленіп, майы жылтырап бетіне шыққан бітік көз біреу екен. Иегіне шыққан селдір сақалы үйпа-түйпа болып, көзге көріксіз көрінеді.

Жылға жиегінде жайылып жүрген құла жорға аяқ астынан пайда болған екеуіне аңтарыла қарап, аз түрды да, қайтадан бидайыққа бас қойды.

Құлан мен Түлен бірінің бүйірінен бірі түртіп қалды, көздері шырадай жанды. Ат қанжығасындағы семіз казының, төтті нанның иісі мұрындарын жарып барады. Сілекейлері шұбырып қоя берді. Құла ат адамға үйірсек екен. Мысық табандап, бұқпантайлап, қасына сақ келген екеуіне оғаш міnez танытқан жоқ.

Аяқ астынан шыққан ашы айқайдан екеуі шошып кетті. Құла ат басын көтерді де қойды.

— Атаңа нәлет, Алдар! Көлшемді бер деймін, көне, күлшемді бер!

Екеуі шөп арасынан аспанға қарай ереуілдесе ербен-десken адам қолын көрді. Ауаны қармап, әлденені ұстай алмай аласұрып жур. Құлан Түленге сыйыр ете қалып:

— Е, бұл да Алдардың алдауына түскен сабаз ғой, — деді.

— Алдағанда да қан қақсатып алдаған. Тіпті үйқыда жатса да, Алдар қудың бұған тыныштық бермеуін қарай гөр, — деп басын шайқады Түлен.

— Ойбай-ау, өзімізді қандай қылыш еді!? Көкала торғай-дай қылған жоқ па?! — деді Құлан қиналған қалыпта.

— Не істейміз енді? — деді Түлен Құланға аңтарыла қарп.

— Не істейміз деген де сөз бола ма екен? Қарнымыз ашты ма? Ашты. Мына қазы мен наңды алып, оңаша апарып жейміз, — деді Құлан.

Түлен де шыдамсызданып тұр екен, дереу қоржынды қанжығадан шешіп алды. Құлан оның аузын ашты да, сары алтындаи болып көз жауын алған майлы қазы мен иісі бүркүраған таба наңды алды. Содан соң екеуі бұлақ маңынан асыға басып, оңаша тұсқа ұзады. Сөйтті де топ шенгелдің түбіне отырып, сылқия тойды.

Әлден уақытта тымық ауаны басына көтере ойбай-лап, жылауға шак қалған ацы дауыс құлақтарына жетті. Екеуі селк ете қалып, орындарынан атып-атып тұрысты.

— Атана мың бір нәлет Алдар, көгермей көктей солғыр, Алдар! Үйді қойып енді қу медиен далада да анысымды андуын қоймағаның ба?! Ә, қу құдай, қу шұнақ болғыр, қу құдай! Құтқарсаншы мені мына тажалдан!

Құлан мен Түлен ат үстінде ойбайын салып келе жатқан адамға аңтарыла қарап, оның жолын тосып тұрды. Шығайбай да алыстан көрінген қос қараға ат басын бұра берген. Екеуі бір-біріне қулана жымың етіп, ішің білсін дегендей ым қағысты. Жат жолаушының алдынан шығып, моп-момақан пішінде жол тосып тұрды.

Шығайбай жақындаидай келе мұсәпір бейнедегі екеуге барлай қарап, сәл өктемдеу үнмен:

— Ей, қу далада қаңғып жүрген қай жалаңаяқсындар? — деді. Әлгіндегі ойбайын ұмытып, ат үстімен мардымси сөйлеп, тәқаппарлана шіреніп қойды.

— Е, байеке, “Басқа түссе баспақшыл” деген емес пе, қай еріккеннен жүрміз дейсіз. Алдар деген қу қан қақ-сатып, сан соқтырып кетті. Содан кек алғалы жолға шық-қан бетіміз еді. Әлгінде ғана алыстан шыққан аңы ай-қайды естіп, кідірістеген едік. Сайдан сіз шықтыңыз. Жөн сұрасайык, әрі аңы айқайына қарағанда жаны қиналып жүрген жан ғой деп мына Түлен ініміз екеуміз сіздің жолынызды тосып едік, — деді Құлан мұләйім ажармен.

Шығайбай атынан домалап түсті. Екі көзі шырадай жанып, екеуінің қасына елпелектей, емпендең жетті.

— Ол алаяқ сендерді де сорлатып кетіп пе еді?! Айналайын-ау, іздегенге сұраған дегендей жолым болайын деп түр екен, ендеше. Жүріндер онда тезірек, сол сұрқияны тауып алыш, қол-аяғын байлап, ханға апарып берейік, — деп өз басының Алдардан көрген теперіштерін жілке тізгендей сарнатып айттып берді. Құлан мен Түлен де кенде қалмай, өз бастарынан өткендерін ашына айтысты. Бірақ екеуі оған бар шындықты актарса да, өздерінің адам пішінді шайтан екендерін айтпай, ішке бүгіп қалды.

Ушеуі ұзақ жүрді. Жалғыз аяқ соқпақ ұшы-қызыры жоқ кең даланы қақ жарып, жыландай ирелендең әлі кетіп бара жатыр.

Құлан мен Түленді Шығайбайдың май жайлы айтқан мылжың әңгімесі жалықтырып жіберді. Арқандаулы аттай, қайта айналып Алдар жеп кеткен қазысы мен майын, өз қолынан ажал тапқан қасқа атын сөз арасына қыстыра береді. Жиі-жій кіжініп-кіжініп екілене, елере сөйлейді.

— Осыдан ғана қолыма түссе, тірідей шайнар едім! — деп тобылғы сапты қамшысымен қонышының сыртынан ұрып-ұрып алады.

Кеш батып, көз байлана бастады. Үшеуі ұзақ жолдан қалжырап, шаршап қалған-ды. Бір жұмырша төбеге тақана бергенде жалғыз аяқ сүрлеу үшке айырылды. Барлығы абдырап, тосылып қалды. Шығайбай серіктеріне қарап:

— Ал қайсысына түскеніміз дұрыс, ақыл беріндер, — деді. Олар абдырған халде бас шайқасты. Шығайбай да дал болды. Ешқайсысы бұрын бұл жақта болып көрмеген екен. Ымырт қоюланған соң бағанадан малданып, сүрлеудегі бағдар болып келген аттың ізі қай бағытқа кеткенін ажырата алмай қалып еді.

— Сол алаяқты ұзынқұлақ біреуден естігенімде осы Алаша хан ауылы маңында деп еді. Бірақ ханды да қара жерге отырғызып кеткенге үқсайды. Содан бері өзі де көрінбей, құрдымға кетіпті деп жүр ғой, — деп Шығайбай бұлдыр әңгіменің, белгісіз әңгіменің ұшын шығарып қойды.

Олар жол айырығындағы жатқан жалпақ тастың үстіне келіп, абдыраған халде тізіле отырысты. Үшеуі өрі ақылдасып, бері ақылдасып, тоқтам қылған ақылы — бүгін осында түнеу болды. Тіпті түнде түс көрсе, таңертен жорысатын да болып келісті.

Шығайбай атын тұсан өрі арқандап, оның ұшын аяғына байлады. Сөйтіп үйиқтауға ыңғайланған бергенді. Жолдан шаршап, қажып келген екі серігі де бастары жерге тиісімен қор ете қалды.

Таңертен Түлен үрейленген үнмен түр-түрлап, жатқан екеуін тұртіп оятты. Шығайбай орнынан шошып тұрды да:

— Ат аман ба? — деп көзін үқалап, айналасына алақтай қарады. Аты жайылып түр екен. “Үң” деп демін

алған Шығайбай Түлениң үрей алған жүзіне көз салды. Құлан орнынан атып тұрған күйі жалпақ тасқа тесіле қарап қалыпты. Тастың бетіне біреу аймандай қып ақ бояумен әлденені жазып кетіпті. Бірақ ішкі түйсіктері мұның тегін еместігін сездіргендей. Тұрғандардың ешқайсысы да әліпті таяқ деп білмейді еken. Сұрай толы көздерімен бір-біріне анырая қаасты. Осы сәтте құла жорға елең етіп, оқыранып, құлағын тігіп тұра қалды.

Әудем жерде торы атты, ақ сөлделі біреу бұларға қарай бет түзеп келеді еken. Шығайбай алға сыйылып шыға берді де:

— Да, молдеке, жол болсын! — деп дауыстап сәлем берді.

— Е, әлей болсын!

Оның дауысы зор, ұнді еken.

— Қайдан келесіз, молдеке?

— Елден келеміз.

— Қайда барасыз?

— Ханға барамыз.

— Шаруаңыз не?

— Е, айтпа, шырақтарым. Алдар деген арбаушы иттің тіліне еремін деп, қатынымды өлтіріп алдым. Соны Алаша ханға барып айтып, жазалаттырмақпын.

Осы сөзді айтқанда молданың күрен жүзі тұтігіп, өні өрт сөндіргендей болып кетті.

— Қалай өлтіріп алып жүрсіз? — деп үшеуі жамырай сұрасты.

— Ойбай, айтпандар, адамды қара басайын десе, бірақ сәтте еken, — деп қойнынан ұзынша, көп тесігі бар тұтікшени сұрып алды. Олар молданың қолында жалт-жұлт еткен тұтікшеге таңдана қарады. Бірақ мұның

әйелдің өліміне қандай қатысы бар екендігіне бас жеткізе алмай тұрды.

— Бірде Алдардан осы тұтікті қасиеті көп деген соң қол басындаі алтынға сатып алып едім. Себебі алдында ол өз әйелін менің көзімше бауыздап өлтірді де, сәлден кейін басына тұрып алып, мына сыйызғыны ойнатып, тірілтіп алған. Содан мен де осы кереметті көрші байға көрсетейін деп, оны үйге қонаққа шақырдым. Алдындағы келісім бойынша, ол келгенде әйелім төсектен тұрмай жата берді. Мен ашуланған болып бардым да, әйелімді пышақпен қыл тамақтан орып жібердім. Ол қорқырады да қалды. “Ашуым” басылған соң, бас жағына отыра қалып, сыйызғыны сұнқылдатып әрі ойнattым, бері ойнattым. Бірақ сорлы әйелім қыбыр етіп, қимылдаған жоқ. Сөйтіп мына Зәкіржан ағала-рыңды құдайдың қос қолдап тұрып қақ төбеден үрғаны ғой, — деп кеңкілдеп жылап жіберді. Ұшеуі жабылып, молданы әрен жұбатты. Көңіл айтып, қайырлы болсын десті. Ол солығын әрен басып, көзінің жасын сұртті.

Молда ұшеуінің шаруа, сапар жайын білгенде, төбесі көкке екі-ақ елі жетпей қалды.

— “Жолы болар жігіттің женгесі шығар алдынан” дегендей, онда жолымыз онғарылғалы тұр екен, бауырларым. Келіндерші бері, құшақтасып көрісіп, шын ниетпен танысайық, — деп ұшеуін бауырына қысты. Тіпті ажарланып, алғашқы қайғысын да ұмытып кетті.

— Алдарың қанша қу болса да, бәрімізді алдай алмас. Әйтеуір қолға түссе, ит терісін басына қаптап, аяусыз кек аламыз, — деп жүзі бөлекше ажарланып, үні мұлдем зорайып шықты. Көзінде ызаның ызгарлы үшқыны ойнап тұрды.

Бір уақытта Тұлен тұрды да:

— Зәке, сіздің жолыққаныңыз мүндай жақсы болар ма?! Бағанадан бері үшеуміздің басымыз қатып, мына жалпақ тастағы жазуды оқи алмай тұрғанымыз.

Молда тастағы жазуды оқығанда, көзі үясынан атыздай болып шығып кетті.

— “Онға жүрсөн, опақ боласың, солға жүрсөн, сопақ боласың, ортамен жүрсөн, шатақ болады. Сәлеммен Алдар” — деп дауыстап жіберді де, Зәкіржан молда сылқ етіп отыра кетті. Шығайбай шынғырып жібере жаздады. Құлан мен Тұлен аз-кем уақыт таңданғандай халде тұрып, өздеріне өздері тез келді.

— Ойпырым-ай, бұл жауыз тіпті жүрер жолды да торып дамыл бермегені ме, — деп Шығайбай қамшысына сүйенген күйі сылқ етіп отыра кетті. Тұлен Құлан-ды тұртіп қалып, сыйырлад:

— Мынауыңның жүні жығылып қалды ғой, бірдеме деп демеп жібермесең болмас, — деді.

Құлан даусын қырнап жөткірініп алды да:

— Байеке, мұнайманыз, тек бірлігіміз ірімесін, істің сәті түсейін деп тұрғанда, үнжырғамызды түсіргеніміз мұлдем жарамайды, — деп сыпайы сөйлемеді.

Шығайбай басын көтеріп алып:

— О, не дегенің, Құланжан-ау, әшейін кес-кестеп алдан орай берген сон, айтып жатқан пендешілік далбас қой, — деп актала сөйлемеді де, сезін жалғап:

— Сонда ол сүркияны қайдан табамыз? Кәпірдің мына бір сөзінен шошығандайсың! Тегі қылар айла-амалынды аяғынан тұсағандай. Ырымға жаман екен, — деп таусыла тіл қатты.

Зәкіржан молда көніл жұбатарлық үнмен:

— Адамды адастырудың алуан айласын жасайтын жанның айтқан сөзіне де, жазған сөзіне де сене беруге болмайды, байеке. Менің көңілім осы ортаңғы жолды қалап тұр. “Шешінген судан тайынбас” дегендей, қандай шатағы болса да өз мойныммен көтеруге дайынмын, — деп өз байлауын айтты.

Шығайбай алғашқы қосылған екі серігіне қарағанда, соңғы қосылған жолаушыны іші біртүрлі жылы көріп қалды. Әрі өзі хат таниды екен. Осыларды ойға түйген Шығайбай қуаныш кетті де:

— Нар тәуекел, мен де сізben біргемін, — деп атына қарай аяңдады.

Құлан мен Түлен дағдарып тұрған. Екеуі де іштерінен мына екі адамның бірынғай ырымшыл қылықтарын ұнатпай, көңілдері сәл-пәл секем алып қалды. Егер Алдарды қолға түсіріп, қинауға салғанда, жаны алқымға келген ол мына бай мен молдаға бұлардың шайтан екенін айтып қойса не болмақ?

— Астапыралла-ай! “Қарға қарғаның қөзін шоқымайды” демекші, адамдар бір-біріне қанша жауықса да, жеме-жемге келгенде Алдарды жақтап, тайқып шыға келмесіне кім кепіл? Онда тіл астына тығатын сиқыр теңгені мәңгілікке жоқ дей бер. Жоқ, болмайды. Біз бұлардан бөлініп, өзге жолмен кетуіміз керек. Алда көрер қызықты әркім өз пешенесінен көрсін” — деп екеуі де іштей ой түйіп тұрып еді. Қос шайтан бір-біріне барлай көз салғанда, ішкі сырларын бірден айтпай-ақ үғысты.

Жасы үлкен Құлан шешімін кесіп бір-ақ айтты.

— Алдардың айласына найза болмайтыны рас. Ол қай жолдан кездессе де, оның бізді күтіп тұрған аялы

алақаны жоқ. Осы тұрган барлығымыздың жауымыз — біреу, мақсатымыз да — біреу. Ол — Алдардан кек алу. Ендеше осы үш айыр соқпақты нар тәуекел деп сүзе, тінте қарауымыз орынды. Мен соқпақтың сол қанатына түсейін, мына Тұлен оң қанатына түссін. Сонда орынды болады ғой деп ойлаймын. Біреуімен ғана жүрсек, қапы қалармыз, — деді.

Олардың барлығы да Құланның ойын құптады. Қолға тұсken Алдарды арқанға байлақ, қайсысы болса да Алаша ханға апаруға бітім қылышты. Содан соң олар бір-бірімен қоштасты да, үш бөлініп жолға шықты. Құлан мен Тұлен екеуіне қызғаныш ете ұзақ қарап тұрып қалды.

Ат артына мінгізген Бізбикені Алдар үйге өкелгенде, біраздан бері қоныстас болып кеткен Жиренше мен Қарааша қатты қуанды.

— Құсың құтты болсын, Алдаржан! Босағаларыннан бақ кетпесін! — деп Қарааша Бізбикенің алдынан шашу шашып, аттан түсірді. Үйге кіргізіп, босаға аттарда ақ тілек айтып, отқа май құйғыздырды. Осылан біраз бұрын Алдардың шешесі қайтыс болған-ды. Содан от басында жеке дара состиып қалған Алдарды Жиренше қасына қоярда-қоймай көшіріп алған болатын.

— Жүрісің көп адамсың. Жалғыз жүріп күнің өте ме, қасыма көшіп кел. Қара серік кімге де болса керек, — деп орынды тілек айтқан.

Қарааша пен Жиренше бұрын Алдарды сырт естіп жүретін. Оның көп істеріне қатты риза болысып, айыз-

дары қанып отыратын. Әсіресе өздеріне тізесін көп батырған Алаша ханның өткен жылы ат басындаі алтынын алып, онымен қоймай, қызына қоса үйленген оқиғасы тұсында тіптен жақсы көріп кеткен еді. Сырттан болса да абырой тілеп, ізгі ниет танытып отырған-ды.

Хан қызының қара сирақ кедейді менсінбей, көптен бері қыңыр мінез танытып жүргендігі Жиренше мен Қарашаштың қабырғасына кәдімгідей-ақ батып жүрген. Әсіресе Алдардың момын шешесін ол жоқта тілдеп, тіпті басына әңгір таяқ ойнатады еken деген жағымсыз, жат хабарды ұзын құлақтан естіген еді. Тіпті соның артынша оның шешесінің құса болып, қатты қападан ауруға бой алдырыпты деген сұық хабар да құлақтарына жеткен.

Соның артынша Алдар хан қызымен ажырасыпты дегенді естігенде, Жиренше мен Қарашаш оның бұл ісін құп көрген-ді.

Екеуінің Алдарды тіпті жақын тартып, шын бауырлардай туыс болып кетуінің өзге де тосын себебі бар еді. Осыдан бір ай бұрын Жиренше Алдардан онбай алданған. Ақ көңіл, ала көйлек Жиренше Алдардың үйде ұмыт қалған алдауыш таяғымды әкелемін деп, мұның атына мініп кеткенін, әрі құлайын деп тұрган моланы сүйетіп қойғанын айтЫП, көзінен жас аққанша құлуші еді. Және де сол оқиғаны қызыққа құмар қалың жүртқа өзі жария етіп болған.

Ертеніне Алдар шуақ көнілмен:

— Жиренше аға, атыңызды алдап мініп, қисық моланы сүйетіп кеткен қылығыма кешірім сұраймын. Атыңызға, данқыңызға сыртыңыздан қанық едім. Бірақ жүздеспеген соң, тілдеспеген соң, білісе бермейді екенбіз. Қара халыққа, момын қауымға, адал жанға қиянат

етпеспін деп Алдан әкеме берген сертім бар еді. Қиянатшыл, қыңыр топқа сермел жүрген таяғымның ұшы сізге тиіп кеткенін кеш білдім. Жолда жолыққан бір жарлы менің астымдағы атты бірден танып: “Ағасы-ау, астыңыздығы ат Жиренше ағанықі гой. Шешенниң өзі қайда, аман жүр мे?”— дегені. Соңда барып санымды бір-ақ соққаным бар емес пе. Бірақ мен де пендемін ғой, егес тілеген жаннан есе алмасам, ішкен асым бойыма тара-маушы еді. Сондай бір тұрт шайтан мені кері беттепей, үйге алып келді. Алайда көкейі құрығырда ызындаған мазасыз ой тұнімен тыныштық бермей, өз ағаны алдағаным ақымақтық емес пе деп қатты азаптандым. Сонымен не керек, өз алдыңызға бас иіп келіп отырған жайым бар. Қандай жаза болса да мойныммен көтеруге әзірмін, — деп Жиреншениң аяғына жығылды.

Жиренше Алдардың есті қылышына барынша ризашылық етті. Қараашаш та сүйкімді жүзді жігіт ағасының мына мойындауына тым риза болып:

— Қайнұм-ау, “Алдыңа келсе атаңың құнын кеш” деген емес пе. Оның еш айыбы жоқ. Қайта бәрін бұлдіріп жүрген Жиренше ағаңың өзі. “Алдар дегенің шын алдағыш болса, мені бір алдап көрсінші”, — деп өзеурап қоймаған өзі. Мұның өзіне де сол керек, — деп сыйтайғана сылқ-сылқ құліп, сары қымызды сапырып отырғандарға ұсынған.

Бізбике жұптыны үйге аяғын сақ басып, тартқыншақтай енді. Шығайбай байдың қызы екенін жаңа сырттан сұрап, біліп алған Қараашаш оған есті, жылы шыраймен:

— Қалқам, алғаш аттаған алтын босағаң құтты болсын! Бақытындың алтын кілті енді өз қолында, қарағым! Бір-бірінді қадірменді қонақтай сыйлай біліндер.

Жоқ болса — жерінбесен, бар болса — керілмесен, өмірің берекелі болады, — деп тілек айтты.

Жиренше мен Қарааш ауылды шақырып, шағын той жасады. Осы бір қызықты думанды Жиреншениң өзі басқарып, келген-кеткен қонақтардың көңілінен шығып отырды.

Той болған күннің ертеңіне Алдарға Алаша ханнан шапқыншылар келді. Келгендер ханның қандай шаруамен шақыртқанын ашып айта алмады. Тек дігірлеп, зығыр егіп, оны жүрде-жүрдің астына алды. Нөкерлердің ызбарлы жүздерінен сескеніп қалған Бізбике, Қарааш, Жиреншелер үрей толы жүзben Алдарға қасты. Бірақ оның өнінде сасқан жанның сиқы жоқ, қайта қос жанары гүл жайнап, тіpten шырайланып алғандай.

Қаумалаған қалың нөкер оны қоршауға алып, әкете барды.

Алаша хан Алдарды ақырып қарсы алды. Көзі шатынап, қолындағы аса таяғымен жерді қойып-қойып қалып:

— Сен неме, менің қызыымды қорлап, аяқ асты ететіндей қандай өулие едің. Бұл қай басынғаның, қай мазағын?! — деді. Ол хан айқайынан сасқан жоқ. Қасқайып тұрып қарсы жауап етті.

— Алдияр, анығына жетпей ақырганыныз әбүйір әпермейтінін менен жақсы білесіз. Қызыныздың алдында әделтен артық қылышқа жасасам, мынау талша мойнымды қылشا қырқыныз, — деп кеудесіне қос қолын қойып, иіліп, сыпайы тәжім етті.

— Е, сонда қалай болғаны? — деп Алаша хан жұмсақып қалды.

— Алдияр, мен де кінәсізбін деп сүттен ак, судан таза болғаным жараспас, бірақ менің ойлаганым —

сіздің абыройыңыз берін даңқыңыз. Сіздің сарайдың қазынасы ортаймасын деп күндіз-түні шарқ ұрып, арқа етім арша, борбай етіп борша болған еңбегімді қызыңыз түсінбеді. Ат арылтып, тон тоздырып, үйіңе келгенде жас жарың қабағыңа қарап, жылы шырай танытқан да бір абзал екен. Әттең не керек, көкейді тескен көп арман орындалмай қор болып жүр ғой, — деп Алдар ауыр күрсінгенде, көзінің жасы ытып кетті.

Айбарлы Алаша алдындағы жанның мына сөзін естіп, тіптен жұмсағып қалды.

— Жарқынның-ау, айтсаншы енді ынтықтырмай. Айтқан сөздерінің мәнін үқпайды ғой. Айтып тұрганың қай қазына? — деп тағынан түсіп, Алдардың қасына келді. Сүқ саусағымен белгі етіп, есік алдындағы екі жасауылды сыртқа шығарып жіберді.

— Жарқынның, сырғыңды ашшы енді, — деп хан Алдардың арқасына алақанын салды.

Ол ханға сыйырлап:

— Тақсыр, бұл сырды екеумізден басқа жан баласы білмесін, сертім бойынша сіз де біл-меуіңіз керек еді, енді амал қанша алдыңызға алдыртқан соң лажым жоқ. Егер жан баласына тісімнен шығармаймын деп ант берсөніз, айтайын, — деді Алдар.

— Міне, антым, міне сертім, — деп хан қос қолын жүрегінің үстіне қойды.

Алдар ханның көзіне сынағандай пішінмен көз салып тұрды да, басын шайқап:

— Тақсыр, көзіңіз тым ойнап кетті-ау, сене алмай тұрганымды қараңызшы. Егер бұл сыр сыртқа сыпсың етіп шығып кетсе, онда қалған өміріңіз өкінішпен өтеді.

— Айналайын, Алдаржан-ау, міне иманым, міне жаным, адам баласына аузынан шығарсам, Алланың оғы атсын, — деп Алаша өле қарғанды. Алдар ханға сенбекен раймен қарады да:

— Тақсыр-ай, үніңдің тым құбылып кеткенінен қорқынқырап тұрмын, — деді.

— Алдаржан-ау, өз намысымды, өз қызығымды өз аяғыммен таптаң ақымақ деп пе едің мені, — деп хан жыларман болды.

— Жарайды, хан ием! Енді айтпасқа шарам қайсы. Сізге сенбекенім құдайға сенбекенім болар. Бірақ сонда да болса соңғы рет серт беріңізші, — дей берген Алдардың сөзін аяқтатпаған хан:

— Жарайды, Алдаржан-ау, жарайды, — деп қаңғалақ ойнап кетті.

— Ендеше, дүниеде қара жерден қасиетті ештеңе жоқ. Туған үямыз да сол, мәңгілікке тыныстап, тынығар үямыз да сол, соған үш рет маңдай тигізіп:

“Тісімнен шықса құдайдың,

Ажалды қара тасы атсын.

Халықтың қарғыс жасы атсын”, — деңіз. Сонда айтайын, — деді Алдар.

Хан антты үш рет қайталап, үш рет жерге бас ұрды. Содан кейін Алдар былай деді:

— Тақсыр, сыр алдында айттар бір-екі ауыз өтінішім бар. Соны орындасаныз, сырды алдыңызға жайып салуға мен дайын.

— Е, айт, қазір-ақ орындааттырайын.

— Ақиқатты айтқанның айыбы жоқ. Қызының үйден кетер алдында анамды тілдеп, өзімді қарғап:

Отындың басын өрт алсын,
Қақпас қана шешен мен
Екеуіндең тәнінді,
Еш емделмес дерт алсын! —

деп еді. Қызыныздың қарғысы қате кетпеді. Қайран шешем екеуміз бір күнде мұрттай үшып ауырдық. Көрі тән қатал дертке қарсы тұра алмады. Аз күн жатты да, қайтпас сапарға аттанып кете барды. Өзім болсам, басымды көтеріп, бері қарағаным екі-үш күн болды. Эйтпесе, осында келем деген ниетке сол қызының кеткен күні-ақ бекінгенмін. Бірақ шарам қайсы, тосын келген кесел адымымды шорт кесті. Ендігі менің тілегім, сол қызының менен келіп кешірім сұраса екен. Содан бері менде не ойын жоқ, не құлқі жоқ, тар төсекте жүз дөңбекшіп, мың аунакшып шығамын. Жат айтса бір басқа, жанкуйерім деп жүрген жанның айтқан қарғысы жаралы қолтыққа сепкен бұрыштай тынштып үйіктатпайды екен, — деді.

Алаша хан ақырып жібергенде, апалақтап жасауыл жетіп келді. Ол қызын сарайға алып келуді бұйырды. Алдар тұтіғіп кеткен ханға мойын бұрып, жұмсақ ұнмен:

— Хан ием, қызыныңға қас жаушыдай жасауыл жібергеніңіз тым әбестеу болып жүрмес пе екен. Жақсылы-жаманды бауырыныздан шыққан балаған фой, тегі қызметші қыздарыныздың біреуін жіберген орынды болар еді, — деді.

— Жоқ, барсын! Жақсылықты түсінбеген жанға сол дауа, — деп жасауылға иек қақты.

Әлден кейін жасауыл хан қызын ертіп келді де, өзі шығып кетті. Хан қызы Алдарды көргенде, көзі үясынан шыға айқайладап жібере жаздады.

Хан ызбарлы жүзбен: